

Miembronan nobo pa Raad van Advies



ORANJESTAD (AAN): mr. F.M. Goedgedrag y drs. M.M. Agumbero recientemente a presta huramento dilanti gobernador Refunjol relaciona cu nan nombramento como miembro di Raad van Advies di Aruba. Na e ocasion aki Gobernador a desea nan hopi exito y perseverancia cu nan tarea importante y tin biaha no asina facil.

Raad van Advies (Consejo Consultativo) ta un instancia institui pa medio di nos Constitucion cu ta conseha gobierno y Parlamento di Aruba riba conceptionan di ley y asuntonan estatal. Raad van Advies ta independiente, ta determina su mesun forma di ehecuta su tarea y den un conseho ta duna su opinion tocante di e legalidad y eficiencia di leyman y proyectonan cu mester wordo regla pa ley. Ta dimes cu un control asina no semper ta cay na favor di esnan cu a tuma e iniciativa pa bin cu un concepto di ley. Pero den cuadro di nos democracia estatal, e transparencia di e maneho gubernamental y di e checks and balances, e control aki dor di Raad ta di suma importancia.

Ta pa e motibo aki cu Raad van Advies tin su base den e Constitucion di Aruba.

Presidente mr. A.J. (Arie) Swaen ta sumamente contento cu e entrada di e dos miembronan nobo aki. Mr. Goedgedrag tabata Gobernador di Antias Hulandes y e prome Gobernador di Pais Corsou y ta combina su miembresia di Raad van Advies cu su funcion di "Staatsraad in

buitengewone dienst na Raad van State", na unda e ta representa e islanan BES. Di e forma aki Sr. Goedgedrag no solamente ta trece un cantidad valioso na experiencia gubernamental den Raad, pero ta duna un aporte na un cooperacion mas estrecho entre Raad van Advies y Raad van State di Hulanda.

Drs. Agumbero ta conoci pa su bista amplio y experticio riba tereno financiero, tambe riba macroniveau, y cu esaki lo aporta na e intensificacion y e calidad di e tareanan di Raad cu ta trata financia publico.

Cu e nombramento aki e constelacion di Raad ta lo siguiente: mr. A.J. (Arie) Swaen, Presidente, mr. F.M. Goedgedrag, Presidente Suplente y miembronan drs. M.M. (Marion) Agumbero, mr. D.G. (David) Kock y drs. C. (Rik) Timmer. Secretario ta dr. H.A. (Hellen) van der Wal y mr. A. (Albert) Braamskamp, Secretario Suplemente.

Despues di e huramentacion: drs. Marion Agumbero, Gobernador di Aruba y mr. Frits Goedgedrag.

E constelacion nobo di Raad van Advies. Riba e potret, sinta, d.r.p.d.: mr. dr. H.A. (Hellen) van der Wal, Secretario, mr. A.J. (Arie) Swaen, Presidente y mr. A. (Albert) Braamskamp, Secretario Suplente. Para, d.r.p.d.: mr. F.M. (Frits) Goedgedrag, Presidente suplente y miembronan mr. D.G. (David) Kock, drs. C. (Rik) Timmer, y drs. M.M. (Marion) Agumbero.